

摘藻堂四庫全書薈要

子部

欽定四庫全書薈要

子部
困學紀聞卷十三



詳校官兵部主事臣雷純

欽定四庫全書薈要卷一萬一千三百二十四

子部

困學紀聞卷十三

宋 王應麟 撰

考史

 翟公異

若璩按公異名汝文丹陽人高宗時官參知政事

謂范蔚宗書語近詞

事多注見其自敘云北方班氏非但不愧今叢陋

乃爾豈筆削未定遂傳之耶乃刪取精要總合傳註

作東漢通史五十卷

其書未見

致堂論馬援曰光武非簡賢者必以其女為太子妃逆

防未然故不授以重任按馬后紀入太子宫在援卒之後防未然之說非

呂成公謂馬援還書王祖戒子舉可法可戒者以教之其心固善不知所教者本不欲其言人之過言未脫口而已自言人之過何其反也

東觀漢記光武詔曰明設丹青之信廣開束手之路

孫公

述傳帝與述書陳言禍福以明丹青之信二句見文選註

明帝為太子諫光武曰有禹湯之明而失黃老養性之

福夫禹湯之道堯舜之道也不以聖人之道養性而取諸黃老謂之學通尚書可乎以無逸之心明立政之體君道盡矣何羨乎黃老

謝承父嬰

若璩按三國志吳主權謝夫人山陰人父嬰漢尚書郎徐令弟承字偉平武陵太守則嬰

當作

為尚書侍郎每讀高祖及光武之後將相名臣

策文通訓條在南宮祕於省閣唯臺郎升複道取急

因得開覽

謝承後漢書見文選注

漢尚書作詔文

見周禮注

尚書郎

乃令中書舍人

見通典

若璩按謝承後漢書一百三十卷唐志有宋志及文獻通考俱

不傳錢遵王曰有見方少師於史館攜去者問之其
後人不可得陽曲傅山先生聞之笑曰某家即有之
明永樂間揚州刊本初邵陽曹全碑出曾以謝
書考證多所裨大勝范書以寇亂亡失矣惜哉

鍾離意謂成湯遭旱以六事自責本於荀子黃瓊謂魯
禧遇旱以六事自讓本於春秋考異郵

邳惲上書王莽云取之以天還之以天莽猶能赦之此
祖伊之得全於殷紂之世也

魯不對策見袁宏紀而范史不載

文苑傳自東漢始而文始卑矣

漢政歸尚書魏晉政歸中書後魏政歸門下於是三省分矣

為杜密之居鄉猶效陳孟公杜季良也為劉勝之居鄉猶效張伯松龍伯高也制行者宜知所擇

若據按高忠憲言居

廟堂之上則憂其民處江湖之遠則憂其君此士大夫實念也居廟堂之上無事不為吾君處江湖之遠隨事必為吾民此士大夫實事也實念實事在天地間週三光敝萬物而常存此蓋荅朱平涵居鄉書余謂今之居鄉為劉勝易為杜密難

東漢有佛書而諸臣論議無述其言者唯襄楷云浮屠

不三宿桑下

班固傳西都賦云招白間下雙鵠揄文竿出此目二句
為對白間猶黃間也註云弓弩之屬御覽引風俗通

白間古弓名文選以間為鵬

非禽名也

東都賦正予樂

依識文改樂為大予

文選李善注亦引大予五臣

乃解為正樂今本作雅樂亦誤

蓋五臣本改為雅

范氏施御注引括地圖曰夏德盛二龍降之禹使范氏
御之以行程南方按左傳范宣子曰昔句之祖在夏

為御龍氏拈地圖之說本於此然蔡墨謂劉累學擾龍於豢龍氏以事孔甲賜氏曰御龍非禹也

文選放歌行注引崔元始正論永寧詔曰鐘鳴漏盡洛陽城中不得有行者永寧漢安帝年號元始崔寔字也後漢紀不載此詔

崔寔四民月令朱文公謂見當時風俗及其治家整齊

即以嚴致平之意

若據按范蔚宗已謂潛夫論足呂觀見當時風政

崔寔政論云諺曰一歲再赦好兒啞啞唐太宗之言蓋

出於此

兒與人同如以可人為可兒若據按潛夫論引諺曰一歲載赦奴兒噫嗟奴恐是好字

之
譌

剛者必仁佞者必不仁龐萌為人遜順而光武以託孤期之不唯失於知人其惑於佞甚矣子陵所以鴻飛冥冥也懷仁輔義之言豈特規侯霸哉

東漢三公無出楊震李固之右而始進以鄧梁君子以為疵故易之漸曰進以正

若據按鄧騰梁商雖外戚皆賢史稱騰辟楊震於幕

府天下復安商辟李固為從事中郎京師翕然稱良輔未可為二公之疵此論太刻吾不取

曲禮少儀之教廢幼不肯事長不肖不肯事賢東都之
季風化何其美也魏昭請於郭泰願在左右供給灑
掃荀爽謁李膺因為其御范滂之歸鄉人殷陶黃穆
侍衛於旁應對賓客闕里氣象不過是矣

中平二年昆陽令愍繇役之害結單言府收其舊直臨
時募顧不煩居民大守丞為之立約見於都鄉正街
彈碑此募役之始也

孔子曰故者毋失其為故也蘇章借故人以立威其流

弊遂為于禁源懷忠厚之俗不復見若章者難與並

為仁矣

若璩按于禁斬平昌稀時稀已降源懷劾于祚元尼須僅罷官亦似有別

精廬見姜肱傳乃請授之地即劉淑包咸檀敷傳所謂精舍也文選任彥升表用精廬李善注引王阜事五臣謂寺觀謬矣

孔北海答王修教曰掾清身潔已歷試諸難謀而鮮過惠訓不倦余嘉乃勲應乃懿德用升爾于王庭其可辭乎文辭溫雅有典誥之風漢郡國之條教如此

歷然

試諸難恐
不可用

孝女叔先雄水經注以為光終符縣人又引益部耆舊

傳符有光洛

疑即終字

熒道有張帛

劉贛父東漢刊誤謂列傳第七十九注最淺陋章懷注
書分與諸臣疑其將終篇故特草草耳今觀南匈奴
論棄蔑天公注引前書云老秃翁何為首鼠兩端秃
翁即天翁也其謬甚矣

曹娥碑云盱能撫節按歌婆娑樂神以五月時迎伍君

傳云迎婆婆神誤也

蔡邕文今存九十篇而銘墓居其半曰碑曰銘曰神誥
曰哀讚其實一也自云為郭有道碑獨無愧辭則其
他可知矣其頌胡廣黃瓊幾於老韓同傳若繼成漢
史豈有南董之筆

周舉傳太原舊俗以介子推焚骸有龍忌之禁一月寒
食按淮南要略云操舍開塞各有龍忌注中國以鬼
神之亡日忌北胡南越皆謂之請龍

郭伋為并州牧有童兒騎竹馬史通云晉陽無竹事不

可信

若據按無論唐晉陽童子寺有竹日報平安而騎竹馬童兒乃西河郡之美稷也美稷唐為鄉

在隰城縣

今汾州府

光武紀建武二十三年陳留太守王況為大司徒

二十七年

堯

虞延傳注引謝承書曰況章和元年為司徒謝承

書誤也

漢詔令人主自親其文光武詔曰司徒堯也赤眉桀也
明帝詔曰方今上無天子下無方伯豈代言者所為

哉

習鑿齒漢晉春秋以蜀漢為正朱文公謂晉史自帝魏
後賢盡更張然晉人已有此論

三國鼎峙司馬公通鑑以魏為正統

本陳壽

朱子綱目以

蜀漢為正統

本習鑿齒

然稽於天文則熒惑守心魏文帝

殂

若璩按何北瞻曰宋書天文志云案三國史並無
熒惑守心之文黃初六年五月十六日壬戌熒惑

入太微至二十七日癸酉乃出宜是入太微

而吳蜀無他此黃權對魏明

帝之言也若可以魏為正矣月犯心大星王者惡之

漢昭烈殂而魏吳無他權將何辭以對

邵公濟謁武侯廟文云公昔高臥隱然一龍鬼蜮亂世
其誰可從惟明將軍漢氏之宗相挽以起意氣所同
欲持尺筆盡逐姦雄天未悔禍世豈能容惟史臣壽
姦言非公惟大夫周誤國非忠廟食故里羞此南充
置公左右不堪僕童我實鄙之築公之宮春秋之法

孰敢不恭俾千萬年仰其高風

陳壽譙周皆巴郡人
今果州陸務觀籌筆

驛詩運籌陳迹故依然想見旌旗駐道邊
一等人間管城子不堪譙叟作降牋
公濟之文蓋果州作若

璩按降箋實

出卻正手

君子小人之夭壽可以占世道之否泰諸葛孔明止五十四法孝直纔四十五龐士元僅三十六而年過七十者乃奉書乞降之譙周也天果厭漢德哉

諸葛武侯曰勢利之交難以經遠士之相知溫不增華寒不改葉貫四時而不衰歷夷險而益固

太平御覽引要覽云

武侯不用魏延之計非短於將略也在易師之上六曰

小人勿用

三國魏有篡弑吳有廢立皆受制強臣蜀漢未亡之前

庸主尸位而國無內憂昭烈武侯之規模遠矣

若璩按後

主禪謂亮曰政由葛氏祭則寡人又華陽國志云諸葛亮卒後主至素服發哀三日李邕上疏比之呂霍後主怒下獄誅之此豈他庸主所能及具毫髮

水經注引武侯與步騭書曰僕前軍在五丈原在武功西十里馬冢在武功東十餘里有高勢攻之不便是以留耳武侯表云臣遣虎步監孟琰據武功水東司馬懿因水長攻琰營臣作竹橋越水射之橋成馳

去此可以裨武侯傳之闕晦翁欲傳末略載瞻及子

尚死節事以見善善及子孫之義南軒不以為然以

為瞻任兼將相而不能極諫以去黃皓諫而不聽又

不能奉身而退以冀主之一悟可謂不克肖矣兵敗

身死雖能不降僅勝於賣國者耳以其猶能如此故

書子瞻嗣爵以微見善善之長以其智不足稱故不

詳其事不足法也此論甚精

若據按張南軒有
諸葛武侯傳一卷

昭烈謂武侯之才十倍曹丕以丕之盛終身不敢議蜀

也司馬懿畏蜀如虎非武侯之敵史通云陸機晉史
虛張拒葛之鋒又云蜀老猶存知葛亮之多枉然則
武侯事蹟湮沒多矣

八陣圖薛士龍曰圖之可見者三一在沔陽之高平舊
壘一在新都之八陣鄉一在魚復永安宮南江灘水
上蔡季通曰一在魚復石蹟迄今如故一在廣都土
壘今殘破不可考

君子其潛如龍非迅雷烈風不起其翔如鳳非醴泉甘

露不食司馬德操諸葛孔明俱隱於耕稼而仕止殊
魏立成徐洪客俱隱於黃冠而出處異如用之易地
則皆然

鄧艾取蜀行險以徼幸閭伯才陰平橋詩云魚貫羸師
堪坐縛爾時可歎蜀無人

張文潛梁父吟曰永安受詔堪垂涕手挈庸兒是天意
渭上空張復漢旂蜀民已哭歸師至堂堂八陣竟何
為長安不見漢官儀鄧艾老翁誇至計譙周鼠子辨

興衰其言悲壯感慨蜀漢始終盡於此矣說齋云人
心思漢王郎假之而有餘人心去漢孔明扶之而不
足

舜禹有天下而不與焉魏文喜躍於為嗣之初大饗於
憂服之中不但以位為樂而已其篡漢也哆然自以
為舜禹可以欺天下乎

曹植拜先君墓與友人宴於
松柏之下為詩云樂至憂復

來又云可不極娛情其末流至於
阮籍禮法之亡自魏文兄弟始

晉傳玄曰魏武好法術而天下貴刑名魏文慕通達而

天下賤守節然則放曠之風魏文實倡之程子謂東漢之士知名節而不知節之以禮遂至苦節苦節既極故魏晉之士變而為曠蕩愚謂東都之季或附曹羣忘漢荃蕙化為茅矣苦節之士安在哉傅玄之言得之

若璩按竊以鍾皓之孫繇亦然

律章句馬鄭諸儒十有餘家魏明帝詔但用鄭氏章句范蜀公曰律之例有八以准皆各其及即若若春秋之凡宋莒公曰應從而違堪供而闕此六經之亞文

也

若璩按朱子解曰謂子不從父不義之命及力所不能養者古人皆不以不孝坐之義當從而不從

力可供而不供然後坐以不孝之罪

魏以不仁得國而司馬氏父子世執其柄然節義之臣
齧巨姦之鉞若王凌以壽春欲誅懿而不克文欽母
丘儉以淮南欲誅師而不遂諸葛誕又以壽春欲誅
昭而不成千載猶有生氣魏為有臣矣鄭漁仲謂晉
史黨晉凡忠於魏者為叛臣齊史黨齊凡忠於宋者
為逆黨史通亦云古之書事也令亂臣賊子懼今之

書事也使忠臣義士羞

學如牛毛成如麟角出蔣子萬機論

司馬孚自謂魏貞士孚上不如魯叔肸下不如朱全昱

謂之正

若璩按正即貞宋避諱故

可乎

魏文帝詔曰三世長者知被服五世長者知飲食

言被服飲

食難曉也俗語有所本

管幼安如郭林宗天子不得臣諸侯不得友蘇文定贊之曰少非漢人老非魏人何以命之天之逸民

江表傳羣臣以孫權未郊祀奏議曰周文武郊鄴鄩非必中土權曰文王未為天子立郊于鄴見何經典復奏曰漢郊祀志匡衡奏言文王郊於鄴權曰文王德性謙讓處諸侯之位明未郊也俗儒臆說非典籍正義不可用權之識見高於羣臣矣漢儒不及也

孫權破關羽而昭烈復漢之志不遂權稱臣於曹操稱說天命英雄之氣安在哉故朱子曰權亦漢賊也諸葛恪傳注虞喜志林曰況長寧以為君子臨事而懼

好謀而成又曰往聞長寧之甄文偉

亦見通鑑

文偉謂費

禕也長寧未詳其人蓋蜀人也廣韻引何氏姓苑有
沉姓廬江人

嚴峻之遜呂蒙有鄭子皮之風陸遜之薦淳于式有晉
祁奚之風吳安得不興乎

孫堅與策皆以輕敵隕其身權出合肥之圍亦幸而免
孫休之遣李衡有高帝之度其討孫綝有叔孫昭子之
斷吳之賢君也

孫峻薦諸葛恪可付大事而恪終死於峻之手易曰比
之无首无所終也漢昭烈託孤於孔明而權乃託孤
於恪劉孫之優劣於此可見

吳築涂塘晉兵出涂中涂音除即六合瓦梁堰水曰滁
河南唐於滁水上立清流關

或以涂塘
音塗誤也

元和郡縣志

滁州即涂中

楚莫敖狃於蒲騷之役將自用也諸葛恪東關之勝亦
以此敗其失在於自用

史通云晉史所采多小書若語林世說搜神記幽明錄是也曹干兩紀孫檀二陽秋皆不之取其中所載美事遺略甚多

曹嘉之干寶晉紀孫盛檀道鸞晉陽秋

又云唐修晉書作

者皆詞人遠棄史班近宗徐庾晁子止亦謂晉史叢冗最甚

李華云干寶著論近王化根源

謂晉紀論以民情風教國家安危之本

放翁豐城劒賦謂吳亡而氣猶見其應晉室之南遷愚謂豐城二劒事出雷次宗豫章記所謂孔章者即雷

煥也蓋次宗之族此劉知幾所云莊子鮒魚之對賈
生服鳥之辭施於寓言則可求諸實錄則否而唐史
官之撰晉史者取之後人因而信之誤矣顏師古注
漢書凡撰述方志新異穿鑿者皆不錄注史猶不取
沉作史乎

豫章記見
藝文類聚

晉元帝為牛氏子其說始於沈約而魏收島夷傳因之
唐正觀史官修晉書亦取焉王劭謂沈約喜造奇說
以誤前代劉知幾亦以為非而致堂乃謂元帝冒姓

司馬過矣

演蕃露云晉郭展為太僕留心於養生而廢馬充多潘尼為太僕箴敘列其事皆推養生而致之於馬今按郭展事見晉諸公贊潘尼為乘輿箴見晉書非太僕箴也蓋誤以二事為一

后妃傳贊持尺威帝庾亮傳論牙尺垂訓帝深念於負芒按殷芸小說晉成帝時庾后臨朝諸庾誅南頓王宗帝問南頓何在荅曰黨峻作賊已誅帝知非黨曰

言舅作賊當復云何庾后以牙尺打帝頭云兒何以作爾語帝無言惟張目熟視諸庾甚懼

阮嗣宗蘇門歌曰日沒不周西月出丹淵中陽精蔽不見陰光代為雄亭亭在須臾厭厭將復隆富貴俯仰間貧賤何必終其有感於師昭之際乎然勸進之作焉能追春秋之誅

反鏡索照出夏侯湛抵疑湛贊閔子騫云聖既擬天賢亦希聖周子前已有此語矣

元板前字上無周子二字

東坡謂劉壯輿曰陶威公忠義之節橫秋霜而貫白日
晉史書折翼事豈有是乎陳忠肅亦曰陶公被誣以
晉之刑政不行於庾元規也元規以筆札陷王隱折
翼化鶴之事隱與杜延業共為之也

庾翼謂天公憤憤李文饒曰昔秦得金策謂之天醉豈
天之常醉哉吁為天者亦難矣詩云民今方殆視天
夢夢既克有定靡人弗勝有皇上帝伊誰云憎是之

謂知天

天醉見張衡西京
賦庾信哀江南賦

何曾荀顗之孝論者比之曾閔夫以孝事君則忠不忠於魏又不忠於晉非孝也顗之罪浮於曾曾之驕奢禍止及家顗之姦諛禍及天下

山濤欲釋吳以為外懼又言不宜去州郡武備其深識遠慮非清談之流也顏延之於七賢不取山王然戎何足以比濤猶礪之於玉也

康節邵子西晉吟有刀難剖公閤腹無木可梟元海頭禍在夕陽亭一句上東門嘯浪悠悠考之晉史賈充

納女以壬辰劉曜陷長安以丙子相去纔四十五年

姦臣孽女之敗國家吁可畏哉

近世賈妃之冊以壬辰而宋之禍亦以丙

子悲夫

若璩按壬辰為理宗紹定五年十二月朔進封才人賈氏為貴妃似道之姊也

江默云唐虞三代有疑赦而無大赦漢唐有大赦而無郊赦故大赦始於春秋而郊赦始於五代愚謂晉王彪之荅簡文云中興以來郊祀往往有赦常謂非宜則郊赦東晉有之非始於五代也

通鑑秦兵既盛謝玄入問計於謝安安夷然荅曰已別

有旨既而寂然玄不敢復言乃令張玄重請安遂命
駕出遊山野與玄圍棋賭墅綱目刪玄不敢復言乃
令張玄重請二句則圍棋為張玄乎謝玄乎世說注
引續晉陽秋曰與兄子玄圍棋然二玄當如漢書敘

臣勝臣夏侯勝以姓別之

若據按綱目刪去二句則圍棋愈是謝玄

王導之孫謚授璽於桓玄謝安之孫澹

若據按澹先已與謚齋冊詣姑

孰

持冊于劉裕此朱子所以歎嗣守之難也

無忝乃祖一陶

淵明而已

若據按兒子詠有辯一篇附注於此曰

自昭明太子誤讀陶命子詩其五章云桓桓長沙伊

勲伊德其六章云肅矣我祖惠和千里於皇仁考淡
焉虛止以祖與考繫於陶侃之下遂作淵明傳曰曾
祖侃晉大司馬又曰自以曾祖晉世宰輔恥復屈身
後代若以淵明高隱不出為承其先志也者不知其
實不爾此詩第一章原陶姓出自唐昌于周二章隱
于戰國顯于漢初功臣陶含三章含之子青為孝景
丞相四章則言枝分派別直至晉有長沙公出五章
實言長沙勲德六章方挽到自已祖考細玩自明更
參以贈長沙公詩序云長沙公於予為族族是一句
祖同出大司馬昭穆既遠已為路人經過潯陽臨別
贈此大司馬當作右司馬即漢高時功臣含丞相青
之父惟誤稱大司馬侃贈大司馬者也昭明認作侃
以此為淵明曾祖果真出於侃此襲公爵者方為吾
從祖昆弟之子豈得曰昭穆既遠已為路人哉詩云
同源分流人易世疎慨然寤歎念茲厥初初正指在
漢初而言且侃廬江郡尋陽人淵明尋陽郡柴桑人

其址貫亦不同或曰陶氏家譜以岱為淵明祖按晉書陶潛列傳祖茂武昌太守與惠和千里之語合岱則侃十七子中之一子官散騎侍郎非太守也家譜多不足信余固援正史及所自著詩正之如此或曰朱子亦稱淵明無忝乃祖賢於王謝後人子必苦辯之與近日傳占衡永初甲子辯謂陶十題甲子皆是晉年不著晉號沈約李延壽說並非此古今傳陶二段佳話一切將抹殺乎余曰占衡有言史文本集歲月炳然前後可考胸次磊落隨意書年陶何必藉此為佳話乎余亦謂淵明自有祖何必藉侃而後重也哉詠又曰按淵明孟府君傳君諱嘉娶大司馬長沙桓公陶侃第十女此豈稱其曾祖之辭耶

桓玄篡逆卞承之謂宗廟祭不及祖知楚德之不長亂臣賊子祭及其祖可以長世乎斯言不當污簡牘

晉史忠義傳可削者三人韋忠不見裴顧辭張華之辟

初節亦足稱矣而仕於劉聰為之討羌而死非為晉
死也謂之忠義可乎王育仕於劉淵劉敏元仕於劉
曜舍順從逆皆失節者也忠義安在哉唐之修晉史
也許敬宗李義府與秉筆焉是惡知蘭艾鸞梟之辨
陶淵明讀史述夷齊云天人革命絕景窮居述箕子云
矧伊代謝觸物皆非先儒謂食薇飲水之言銜木填
海之喻至深痛切讀者不之察爾顏延年誅淵明曰

有晉徵士與通鑑綱目所書同一意南史立傳非也
策扶老以流憩謂扶老藤也見後漢蔡順傳注

淵明與子儼等疏潁川韓元長謂韓融韶子後漢有傳濟北汜

稚春謂汜毓

晉書有傳集云范稚春誤南史汜幼春蓋避唐諱治字之嫌

朱文公曰陶公栗里前賢題詠獨顏魯公一篇令人感

慨今考魯公詩云張良思報韓龔勝恥事新狙擊苦

不就舍生悲拖紳嗚呼陶淵明奕葉為晉臣自以公

相後每懷宗國屯題詩庚子

若璩按淵明十題甲子自庚子始歲自

謂羲皇人手持山海經頭戴漉酒巾興與孤雲遠辨
隨還鳥泯見廬山記集不載

樂廣客蛇影與風俗通所載杜宣事同

若璩按風俗通
義劭祖彬為汲

令賜主簿杜宣酒感壁上
弩影而致疾尤詳于晉書

蒼蠅傳赦異苑以為晉明帝與苻堅載記同

嵇康魏人司馬昭惡其非湯武而死於非辜未嘗一日

事晉也晉史有傳康之羞也後有良史宜列於魏書

司馬師引二敗以為已過司馬昭怒王儀責在元帥之

言昭之惡甚於師

劉殷失節於劉聰而戒子孫曰事君當務幾諫大節已虧其言之是非不足論也

干寶論晉之創業立本固異於先代後之作史者不能為此言也可謂直矣

焚石勒之幣江左君臣之志壯矣僭號之國十六而晉

敗其一

符堅

滅其二

李勢慕容超姚泓

不可以清談議晉

若璩按此

王氏得母自傷其本朝乎

晉簡文詠庾闡詩云志士痛朝危忠臣憂主辱東魏孝
靜詠謝靈運詩曰韓亡子房奮秦帝魯連恥本自江
海人忠義動君子至今使人流涕

祖逖曰晉室之亂非上無道而下怨叛也晉之德澤淺
矣姚弋仲曰亟自歸於晉王猛曰勿以晉為圖人心
知義非後世所及也

南豐記王右軍墨池云愛人之善雖一能不以廢愚謂
右軍所長不止翰墨其勸殷浩內外協和然後國家

可安其止浩北伐謂力爭武功非所當作其遺謝萬
書謂隨事行藏與士卒同甘苦謂謝安虛談廢務浮
文妨要非當世所宜言論風旨可著廊廟江左第一
流也不可以藝掩其德謂之一能過矣

慕容恪尚在憂方大耳如得臣猶在憂未歇也覘國者
以人為輕重

宣帝紀論竊鐘掩耳以衆人為不聞出淮南子

楊盛不改義熙年號其志如陶靖節孰謂夷無人哉

武盛

都王 何校本

云王疑作氏

袁宏以伏滔比肩為辱似知恥矣而失節於桓溫之九
錫恥安在哉

謝邈傳孝武多賜侍臣文詔辭義有不雅者邈輒焚毀
之通鑑云帝好為手詔詩章以錫侍臣或文詞率爾
徐邈應時收斂還省刊削皆使可觀經帝重覽然後
出之此一事也晉書以為謝邈通鑑以為徐邈必有

一誤

若據按通鑑亦本晉書
儒林傳 錫元板作賜

晉之伐吳杜預曰孫皓或怖而生計則明年之計或無所及隋之伐陳文帝投棊於江曰使彼懼而知改吾又何求隋文之識若優於預矣以時考之吳猶有死守之臣杜預所以詭形而不敢露陳不聞力戰之將隋文所以衡行而無所忌預之言近乎實文帝之言非其誠也

文心雕龍謂江左篇製溺乎玄風續晉陽秋曰正始中王何好莊老至過江佛理尤盛郭璞五言始會合道

家之言而韻之許詢孫綽轉相祖尚而詩騷之體盡

矣

愚謂東晉玄虛之習詩體一變觀蘭亭所賦可見矣

梁武帝勅羣臣自太初終齊撰通史六百二十卷元魏濟陰王暉業起上古終宋著科錄二百七十卷其書無傳高氏小史自天地未分至唐文宗為百二十卷今雖存而傳者鮮自書契以來未有如通鑑者

若璩按王

氏似以通史與通鑑同一編年體隋經籍志唐藝文志並列正史吳均傳武帝使撰通史起三皇訖齊代均草本紀世家畢唯列傳未就卒史通云其書以史記為本異者惟無表耳此豈編年體玉海入雜史類

不入編
年得之

宋周朗有櫝帶寶笥著衣之論司馬文正公有耳視目
食之說皆足以儆世迷

魏之篡漢晉之篡魏山陽陳留猶獲考終亂賊之心猶
未肆也宋之篡晉踰年而弑零陵不知天道報施還
自及也齊梁以後皆襲其跡自劉裕始

徐羨之傅亮謝晦之死猶晉之里克衛之甯喜也文帝
不失為叔孫昭子

宋文帝魏太武佳兵者也皆不克令終不祥好還之戒
昭昭矣

葉少蘊云齊武帝欲為裴后立石誌墓中王儉以為非
古或以為宋元嘉中顏延之為王球作誌墓有銘自
宋始唐封演援宋得司馬越女冢銘隋得王戎墓銘
為自晉始亦非是今世有崔子玉書張衡墓銘則墓
有銘自東漢有之周益公謂銘墓三代有之唐開元
四年偃師耕者得比干墓銅槃東漢誌墓初猶用甄

久方刻石

張融風止詭越齊高帝曰此人不可無一不可有二程致道贊米元章云是千載人不可無一

南豐序齊書曰蕭子顯之文喜自馳騁其更改破析刻雕藻績之變尤多而其文益下愚謂子顯以齊宗室仕於梁而作齊史虛美隱惡其能直筆乎

梁武帝曰應天從人致堂謂易之革曰順天應人未聞應天也為是言者不知天之為天矣愚按梁武之父

名順之故不云順天避諱也後人應天之語蓋襲其

誤

蕭道成之篡奪順之為
爪距豈知祚移其子乎

梁武帝時錢陌減始有足陌之名唐末以八十為陌漢
隱帝時王章又減三錢始有省陌之名

後魏葛榮陷冀州賈景興稱疾不拜每捫膝曰吾不負
汝偽楚之僭喻汝礪捫其膝曰此豈易屈者哉以捫
膝自號蓋本於此

宇文弒君之罪甚於高歡之逐君乃以周公自擬亦

一莽也

北齊魏長賢曰王室板蕩彝倫攸斁大臣持祿而莫諫
小臣畏罪而不言虛痛朝危空哀主辱匪躬之故徒
聞其語有犯無隱未見其人發不恤緯而憂宗周之
亡女不懷歸而悲太子之少況委質有年安可自同
於匹庶其言凜然可以立懦夫之志作史者以魏收
之族與之同傳

若璩按謂北史非北齊書

蘭艾混殽甚矣

長賢微之父也

高洋之惡浮於石虎苻生一楊愔安能救生民之溺乎

執笏始于宇文周保定四年紫緋綠袍始于隋大業六年

蕭方等梁元帝子為三十國春秋以晉為主附列劉淵以下二十九國通鑑晉元興三年引方等論綱目但云蕭方誤削等字

晉之篡魏以賈充其亡亦以充隋之平陳以楊素其亡亦以素

立太子妃易太子亡之兆也

玄感之於素猶李敬業之於

勣也煬武之立素勣之力也其子

若璩按敬業勣之孫

欲撲其

燎可乎

祖君彥檄光武不隔於反支乃明帝事見王符潛夫論

反支日用月朔為正戌亥朔一日申酉朔二日午未朔三日辰巳朔四日寅卯朔五日子丑朔六日

北史李繪六歲求入學家人以偶年俗忌不許偶年之忌見於此

梁武帝策錦被事劉峻以疏十餘事而見忌又問栗事沈約以少三事而為悅君之於臣爭名記誦之末燕泥庭草於隋煬何議焉

李仲信

至

為南北史世說朱文公謂南北史凡通鑑所

不取者皆小說也

若據按語類云南北史除通鑑所取者其餘只是一部好笑底小說

洵然然則通鑑果專取國家盛衰生民休戚善可為法惡可為戒以為書云

隋萬寶常聽樂泣曰樂聲淫厲而哀天下不久將盡隋之不久不待聽樂而知也師尚父曰以不仁得之以不仁守之必及其世使隋用寶常之言復三代之樂其能久乎寶常之先見不逮房玄齡

若據按不但房喬其父彥謙亦

具先見
見隋書

徐楚金云隨文帝惡隨字為走乃去之成隋字隋裂肉也其不祥大焉殊不知隨從走走安步也而妄去之豈非不學之故

陳無淮無荆襄無蜀而立國三十二年江左猶有人也魏節閔帝陽瘖避禍至于八年

若據按魏書北史並云絕言垂將一紀終

身為范粲可也天何言哉之言一出諸口遂以不免程子曰節或移於晚守或失於終

寧為袁粲死不作褚淵生宋石頭城之謠也寧為王凌

死不為賈充生宋沈攸之之言也悲君感義死不作
負恩生陳魯廣達之畱名也與其含恥而存孰若蹈
道而死秦郭質之移檄也與其屈辱而生不若守節
而死燕賈堅之固守也寧為南鬼不為北臣則有齊
新野之劉思忌寧為趙鬼不為賊臣則有趙仇池之
田崧寧為國家鬼不為賊將則有魏樊城之龐惠寧
為國家鬼不為羌賊臣則有晉河南之辛恭靖之人
也英雄勁氣如嚴霜烈日千載如生其視叛臣要利

者猶犬彘也

韋孝寬知兵而不知義尉遲迴之討楊堅所以存周也
孝寬受周厚恩乃黨堅而滅迴堅之篡也孝寬實成
之難以逭春秋之誅矣

楊堅以后父篡國亦一莽也以不仁得之以不仁守之
必及其世堅之謂矣莽堅之女皆節婦也為其父者
亦少愧哉

顏見遠死節於蕭齊其孫之儀盡忠於宇文周常山平

原之節義有自來矣

若據按惜有歷仕梁齊周隋之推之推見遠之孫之儀之弟

也父協

亦義士

困學紀聞卷十三

欽定四庫全書薈要卷一萬一千三百二十五

子部

困學紀聞卷十四

宋 王應麟 撰

考史

唐府兵之數兵志云十道置府六百三十四而關內二百六十一百官志凡六百三十三陸贄云府兵八百所而關中五百杜牧云折衝果毅府五百七十四舊志六典云天下之府五百九十四會要云關內置府二百六十一又置折衝府二百八十通計舊府六百

三十二通典云五百七十四理道要訣云五百九十
三鄴侯家傳云諸道共六百三十府今以地理志考
之十道共有府五百六十六關內二百七十三餘九
道二百九十三參以志傳差互不齊神宗問何處言
府兵最備王文公對曰李鄴侯傳言之詳備然府數
與諸書亦不同

了齋

若璩按了齋陳瓘號

云顏回配饗先聖其初但為立像至開

元中始與十哲合為一座按唐志開元八年詔十哲

為坐像

集古錄李陽冰縉雲孔子廟記云換夫子之容貌增侍立者九人蓋獨顏回配坐而閔損

等九人為立像陽冰修廟在肅宗上元二年其不用開元之詔何也

魏徵傳帝謂羣臣曰此徵勸我行仁義既效矣新史潤色之語也貞觀政要云太宗謂羣臣曰貞觀初人皆異論云當今必不可行帝道王道唯魏徵勸我既從其言不過數載遂得華夏安寧遠戎賓服突厥自古已來嘗為中國勍敵今酋長並帶刀宿衛部落皆襲衣冠使我遂至於此皆魏徵之力新史於屬賓傳又

云惟魏徵勸我修文德安中夏以通鑑考之與政要

所載同一事

或謂太宗以既效自滿非也

鄭毅夫

若璩按毅夫名獬安陸人進士第一官翰林學士宋史有傳

謂唐太宗功業

雄卓然所為文章纖靡浮麗嫣然婦人小兒嘻笑之聲不與其功業稱甚矣淫辭之溺人也神宗聖訓亦

云唐太宗英主乃學庾信為文

溫泉銘小山賦之類可見

新史論張公謹之抵龜曰投機之會間不容穢鄭伯克段于鄆春秋所以紀人倫之大變也曾是以為投機

乎晉樂書將弑厲公召士匄韓厥二人皆辭太宗臨
湖之變問李靖李勣二人皆辭靖勣賢於公謹遠矣
若據按鄭伯以下
乃王氏論新史論

唐太宗贈堯君素蒲州刺史詔曰雖桀犬吠堯乖倒戈
之志而疾風勁草表歲寒之心我藝祖贈韓通中書
令制曰易姓受命王者所以徇至公臨難不苟人臣
所以明大節大哉王言表忠義以厲臣節英主之識
遠矣歐陽公五代史不為韓通立傳劉原父譏之曰

如此是第二等文字

通附傳在建隆實錄 齊武帝使沈約撰宋書疑立袁粲傳審

之於帝帝曰袁粲自是宋室忠臣惜乎歐陽子念不及此

賢臣久於位則其道行房喬以之成貞觀之治姦臣久

於位則其欲肆林甫以之成天寶之亂

若璩按唐房杜並稱而杜

以貞觀二年正月相三年十二月罷故止及房房相二十三年李相十九年

唐史發潛謂武氏之起袁天綱言其貴不可言李淳風

云當有女主王天下已在宮中此必武氏僭竊之後

姦佞之徒神其事言天之所啓非由人事也愚謂左

氏載陳敬仲畢萬之筮太史公載趙簡子之夢皆此類

佩魚始於唐永徽二年以李為鯉也武后天授元年改佩龜以玄武為龜也

治平末年始鬻度牒考之唐史肅宗時裴冕建言度僧道士收貲濟軍興此鬻牒之始也

若據按出裴冕傳食貨志則前此安

祿山反楊國忠遣侍御史崔衆至太原納錢度僧尼道士旬日得百萬緡明年御史鄭叔清與宰相裴冕議度道士僧尼實不始於冕至今祠

鍾紹京為宰相而稱義男於楊思勗之父史不載也而
石刻傳于後世人皆見之惡之不可揜如是臧堅以
刑人之言為辱此何人哉林甫國忠因力士以相其
原見于此李揆當國以子姓事輔國不恥也紹京何
責焉

若據按紹京起家錄事耳故王氏謂不敢望第一人之李揆

鄭薰傳云宦人用階請蔭子薰却之不肯敘亦庶幾有
守矣文苑英華有薰所撰仇士良神道碑云孰稱全
德其仇公乎其敘甘露之事謂克殲巨孽乃建殊庸

以七松處士而秉此筆乃得佳傳於新史豈作史者
未之考歟碑云大中五年念功錄舊詔詞臣撰述不
敢虛美以元惡為忠賢猶曰不虛美乎宣宗所褒表
者若此唐之不競有以哉

宣宗召韋澳問內侍權勢
何如對曰陛下威斷非前

朝比上閉目搖手曰尚畏之在士
良之立碑其亦畏昏祿之黨歟

席豫未嘗草書曰細猶不謹而況巨耶然豫為黜陟使
言安祿山公直無私其迷國之罪大矣安在其能謹
哉唐史立傳褒之未有著其罪者何小人之多幸也

席建侯即豫也唐史避代宗諱稱字孔光黨王莽則不言溫室樹不足以為謹席豫黨祿山則未嘗草書不足以為謹

容齋續筆辯嚴武無欲殺杜甫之說愚按新史嚴武傳多取雲溪友議宜其失實也

通鑑載李德裕對杜悰稱小子聞御史大夫之命驚喜泣下致堂謂德裕豈有是哉杜悰李宗閔之黨故造此語以陋文饒史掇取之以文饒為人大概觀焉無此事必矣愚按此事出張固所撰幽閑鼓吹雜說不

足信也

李泌傳加集賢殿崇文館大學士泌建言學士加大始
中宗時及張說為之固辭乃以學士知院事至崔圓
復為大學士亦引泌為辭而止愚按崔圓相肅宗在
泌前會要貞元四年五月泌奏張說懇辭大字衆稱
達禮至德二年崔圓為相加集賢大學士因循成例
望削去大字此乃泌引圓為辭傳誤矣

韋濟試理人策第一致堂謂濟被識擢不聞以循良稱

是實不副言矣愚考通鑑開元二十二年相州刺史
韋濟薦方士張果蓋逢君之惡者不但實不副言也

少陵贈韋左

丞詩即濟也

舊史敬宗紀李翱求知制誥面數宰相李逢吉過愚謂
翱為韓文公之友此逢吉所深忌也面數其過可謂
直矣求知制誥乃誣善之辭荆公嘗辯之曰世之淺
者以利心量君子

老學庵筆記云舊制兩省中書在門下之上元豐易之

愚觀李文簡歷代宰相表云中書門下班序各因其時代宗以前中書在上憲宗以後門下在上大厯十四年崔祐甫與楊炎皆自門下遷中書不知何時升改放翁所記蓋未考此

李靖兵法世無全書略見於通典今問對出阮逸因杜氏所載附益之

唐六典太子令書畫諾本朝至道初改為準此東宮畫諾也陸龜蒙說鳳尾諾云東宮曰令諸王曰教其事

行則曰諾猶天子肯臣下之奏曰可也晉元帝為琅邪王批鳳尾諾南齊江夏王學鳳尾諾則諸王亦畫諾矣後漢書云南陽宗資主畫諾梁江州刺史陳伯之目不識書得文牒辭訟惟作大諾則郡守刺史亦畫諾矣

唐六典開元禮宣示中外未有明詔施行見呂溫集南豐謂六典本原設官因革之詳上及唐虞以至開元其文不煩其實甚備可謂善於述作者

李德裕傳韋弘質建言宰相不可兼治錢穀嘉祐六年

制策

胡武平撰

錢穀大計也韋賢之言不宜兼於宰相蓋

弘字避諱誤以質為賢

若璩按今樂城應詔集韋賢賢正作質

劉秩為祭酒上疏曰士不知方時無賢才臣之罪也元

稹守同州旱災自咎詩曰上羞朝廷寄下媿閭里民

秩稹可謂知所職矣其言不可以人廢

若璩按韋應物詩云身多

疾病思田里邑有流亡愧

俸錢何讀之惻惻動人

唐宗室表宰相十一人林甫回程石福勉夷簡宗閔適

之峴知柔傳止云九人蓋不數福宗閔宗室為狀頭

有李肱

若據按李肱即開成元年賦霓棠羽衣曲仄韻長律登第者

唐制舉之名多至八十有六凡七十六科至宰相者七

十二人本朝制科四十人至宰相者富弼一人而已

中興復制科止得李奎一人

若據按孝宗乾道七年十一月戊寅錫李奎制

科出身官

終著作郎

唐宏詞之論其傳于今者唯韓文公顏子不貳過制舉之策其書于史者唯劉蕡一篇不在乎科目之得失

也若據按王應麟傳初登第言曰今之事舉子業者沽名譽得則一切委棄典章制度漫不省非國家所望於通儒於是閉門發憤誓以博學宏詞科自見假館閣書讀之寶祐四年中是科後弟應鳳亦中是科此即昌黎所應之詞科也李燾傳子壘試賢良方正直言極諫科燾素謂唐三百年不愧此科者惟劉去華心慕之嘗以所著通論五十篇見蜀帥張燾欲應詔不果其友晁公遡以書勉之燾荅以當修此學必不從此舉既不克躬試命二子壘塾習焉至是吏部尚書汪應辰薦壘可應詔故有是命此即劉蕡所應之制科也人多混而莫辨

李泌父承休聚書二萬餘卷誠子孫不許出門有求讀者別院供饌

見鄴侯家傳

鄴侯家多書有自來矣

藝文志員倣太玄幽贊十卷開元四年京兆府童子進
書召試直弘文館李泌傳云開元十六年員倣九歲
升坐詞辯注射帝異之年歲皆不同蓋泌傳所載本
鄴侯家傳當以志為正

韋應物史逸其傳沈作喆為應物傳敘其家世云夏之
孫待價仕隋為左僕射封扶陽公蓋據林寶姓纂唐
書韋待價乃挺之子武后時拜文昌右相豈二人同

名歟當考

若璩按晉尚清言而晉書無許詢傳唐
尚詩歌而舊新兩唐書無韋應物傳

劉闢亂于蜀其嫂庾氏棄絕不為親白樂天為詩贈樊
著作與陽城元稹孔戡並稱欲其著書編為一家言
而唐史於庾氏無述焉故表而出之

唐六典記南內龍池程泰之雍錄謂諂辭皆出李林甫
而非張九齡所得知也愚按九齡集有龍池聖德頌
則誇詡符瑞雖賢者不免

鄭餘慶採士庶吉凶書疏之式雜以當時家人之禮為
書儀兩卷後唐劉岳等增損其書司馬公書儀本於

此

若據按唐藝文志有王儉弔荅書儀十卷皇室書儀七卷書儀之名又始於此

唐開元之任將以久任而兆亂其權專也我藝祖之任將以久任而成功其權分也柳氏家學錄謂正觀故事邊將連帥三年一易收其兵權然用得其人御得其道不在於數易也

忌日行香始於唐崔蠡奏罷之本朝宋景文公奏云求於非福則是諂祭懺於無罪則是誣親其言不行誠齋易傳云文宗陷於宦寺之險而未能出惟裴度可

以出之然度自陷於程异元稹浸潤之內愚謂稹在
穆宗時异在憲宗時非文宗事也

顏魯公為郭汾陽家廟碑云端一之操不以險夷槩其
懷堅明之姿不以雪霜易其令斯言也魯公亦允蹈
之

楊綰贈官制云歷官有素絲之節庀家無匹帛之餘史

臣

若璩按史臣謂
劉昫舊唐書

謂當時秉筆者無愧色

唐時午日揚州江心鑄鏡供進又千秋節進鏡滴水李

氏收其一乃方鏡背鼻有篆文五日字面徑八寸重
五十兩盛露囊千秋節戚里皆進華山記云弘農鄧
紹八月曉入華山見童子執五綵囊盛柏露食之又
荆楚風土記以五綵結眼明囊相傳赤松子以囊盛
柏露飲之而長生皆八月中事

舊史德宗紀貞元六年岐州無憂王寺有佛指骨寸餘
先是取來禁中供養二月乙亥詔送還本寺此迎佛
骨之始也韓愈傳云鳳翔法門寺有護國真身塔內

有釋迦文佛指骨一節

寺名與前不同

貞元元和咸通迎佛

骨者三

若據按癸丑冬薄游汧隴經過扶風縣北之法門寺買唐天祐碑始知即無憂王寺扁尚

存

蕭穎士與韋述書欲依魯史編年著歷代通典起漢元
十月終義寧二年約而刪之勒成百卷於左氏取其
文穀梁師其簡公羊得其覈綜三傳之能事標一字
以舉凡然其書今無傳焉略見於本傳而不著通典
之名

楊文莊公徽之

若璩按徽之字仲猷浦城人真宗特好置侍讀學士官之本傳不載其諡

言唐朝士族閱諱行錄悉能記之按館閣書目諱行

錄一卷以四聲編登科進士族系名字行第官秩及

父祖諱主司名氏

起興元元年
盡大中七年

宋敏求續為後錄五

卷

溫彥博傳我見其不逮再棋矣出說文引虞書棋三百

有六旬李密傳敖庾之藏有時而賜

若璩按今
本作餽

出詩

王赫斯怒鄭箋斯音賜盡也新史尚奇類此

馬總通歷所載公子曰先生曰者皆虞世南帝王略論

略論五卷起太昊
訖隋假公子答問

李翱為史官請作行狀者指事說實直載其詞然我朝
名公秉筆亦有誤者歐陽公為范文正碑云至日大
會前殿上將率百官為太后壽公上疏其事遂已其
後老泉編太常因革禮有已行之明驗質之歐公公
曰諫而不從碑誤也東坡為張文定銘云神宗問元
昊初臣何以待之公曰臣時為學士誓詔封冊皆臣

所草李微之

若璩按微之名心傳并研人舜臣之子道傳之兄見儒林傳

考國史

誓詔在慶歷四年十月封冊在十二月明年二月文

定始為學士

封冊乃宋景文撰

朱文公為張忠獻行狀其後

語門人云向只憑欽夫寫來事實後看光堯

按光堯高宗尊

號

實錄其中多有不相應處以三事觀之罔羅舊聞

可不審哉

唐配帝皆一后唯睿宗二后昭成明皇之母開元四年

升祔此失禮之始也

若璩按肅明皇后睿宗之元妃明皇之嫡母也縱二后並配當

行於開元四年不當遲至二十一年始
袞失禮之中又失禮矣王氏析猶未精

龍朔改左右散騎常侍曰左右侍極職源誤以左史為
左侍極而近世制詞多踵其誤

石林序盧鴻一草堂圖云唐舊史鴻一蓋二名與中嶽
劉真人碑所書合新史刪去一字不知何據當以舊
史為正愚按南齊張融曰昔有鴻飛天首積遠難明
越人以為鳬楚人以為乙人自楚越鴻常一耳鴻一

之義取於此

若璩按歷代名畫記盧鴻一名浩然高
士也新唐書作盧鴻字顗然亦各有本

張融語出南史隱逸顧歡傳通鑑考

異引中岳真人劉君碑云盧鴻傳無一字

考古編以通鑑貞觀十三年房玄齡請解機務詔斷表

為今斷來章之祖愚按晉山濤傳手詔曰便當攝職

令斷章表此斷表之始非昉于唐也

若據按胡三省通鑑唐紀註今

之讓官者奉表三讓不許勅斷來章則閣門不復受其表即唐制之斷表也

韓柳方駕而其行殊元白齊名而其操異

管華嵇阮亦然

唐亦有蔡京

咸通三年嶺南節度使以貪虐誅京始末見雲溪友議

此姦臣名氏

之同者吳有桓彝晉亦有桓彝此忠臣名氏之同者

若兩曾參兩毛遂則賢否分矣

兩毛遂見西京雜記
員半千詩用之
若

璩按名氏之同之奇者莫過王莽之前有王莽朱買臣之後有朱買臣

顏魯公為刑部尚書有舉家食粥之帖蓋自元載制祿
厚外官而薄京官京官不能自給常從外官乞貸楊
綰既相奏加京官俸魯公以綰薦自湖州召還意者
俸雖加而猶薄歟

李康運命論曰以一人治天下不以天下奉一人大寶
箴用之

李方立曰沈約年八十手寫簿書本杜牧所作方立墓誌本朝建隆詔亦云沈約為吏手寫簿書愚按理道要訣云宋光祿大夫傅隆年過七十手寫籍書梁尚書令沈約位已崇高議請寶重蓋誤以傅隆為沈約也

若璩按宋書傳隆傳謹於奉公常手抄書籍梁書沈約傳無

孝宗問周益公云唐孫樵讀開元錄雜報數事內有宣政門宰相與百僚廷諍十刻罷徧檢新舊唐史及諸書並不載益公奏太平御覽總目內有開元錄一書

祖宗朝此本尚存近世偶不傳耳容臣博加詢訪

蕭邁與其子三兒生日詩曰吾家九葉相盡繼明時出

唐史云自瑀逮邁凡八葉宰相此云九葉宰相世系

表梁貞陽侯之後有鄴相宣宗

若璩按俱表所云齊梁房者也

姚崇十事見開元升平源通鑑不取

若璩按通鑑不取非也明王三原應

召至都鄒智見曰三代而下人臣不得見君所以事
事苟且公勿拜官先請見君歷陳時政於上前庶其
有濟一受官職再無可見
之時矣說正與姚元之同

王起廣五位圖舊史云五運圖

李白上宣唐鴻猷一篇即本傳所謂召見金鑾殿奏頌一篇者也今集中闕

緋衣小兒之謠朝野僉載謂裴炎也而張權輿以讒裴度

韓文公子祖雖有金根車之譏而祖子綰袞皆擢第袞為狀元君子之澤遠矣

孔戣為華州刺史奏罷明州歲貢淡菜蛤蚧之屬

見昌黎集

元稹為越州復奏罷之

見白樂天集若據按亦見本人集狀中

蓋嘗罷

於元和而復貢於長慶也

若據按狀云海味起自元和四年而九年以一縣令

論罷十五年復令供進至孔戣奏罷則在元和二年只當云一罷於元和二年孔戣再罷於元和九年某縣令三罷於長慶二年元稹也方合鄉邦故實

畢炕天寶末為廣平太守拒安祿山城陷覆其家唐史附于父構傳蓋取韓文公所撰畢垆誌然炕之名不書於忠義傳故文公謂廣平死節而子不苟其澤愚謂廣平之節如此河北二十四郡不止一顏平原也通鑑亦不書其事

廣德元年十一月太常博士柳伋上疏請斬程元振於是削元振官爵放歸田里東坡謂及其有事且急也雖代宗之庸程元振之用事柳伋之賤且疎而一言以入之不終朝而去其腹心之疾愚按登科記伋乾元元年進士翰林院故事載寶應已後伋自校書郎充學士出鄆縣尉改太常博士兵部員外諫議大夫皆充學士新唐史程元振傳云太常博士翰林待詔柳伋上疏以翰林故事考之伋是時為學士非待詔

也伉以博士在近林職近而親不可謂賤且疎唐史
不為伉立傳故詳著其事俾覽者知詞臣之獻替不
獨陸贄李絳也

東坡謂學韓退之不至為皇甫湜學湜不至為孫樵朱
新仲曰樵乃過湜如書何易于褒城驛壁田將軍邊
事復佛寺奏皆謹嚴得史法有補治道

林寶元和姓纂十卷自皇族之外各依四聲類集每韻
之內以大姓為首鄧名世謂稍能是正數十條而齊

秦之屬亦所未暇至鉏丘茅夷指為複姓又不勝其
謬鄭樵謂竇不知自姓所由來

劉允濟曰班生受金陳壽求米

受金事未詳 若據按
文心雕龍云班固述漢

遣親攘美之罪微賄鬻筆之愆公理辨之究矣公理
仲長統字辨之究猶上文論之詳非辨其誣也 其
實二句純用北史柳蚪傳班固致受金之名陳壽有
求米之論 何此瞻曰文帝即王位誅丁儀丁廙并
其男口安得晉時猶
有子在覓米事誣

劉知幾領史事言五不可曰孫盛取嫉權門王劭見讎
貴族文粹云王韶直書見讎貴族宋王韶之為晉史

序王珣貨殖王廙作亂珣子弘廙子華並貴韶之懼
為所陷深附結徐羨之傅亮等當從文粹為王韶新
史誤以韶為劭韶之弑君之賊也身為梟獍而東史
筆其誰服之傳曰無瑕可以戮人
若璩按晉安帝崩乃劉裕使王
韶之密加酖毒故曰弑君之賊

李晟每戰必錦裘繡帽自表而晟以勝宋殷孝祖每戰
常以鼓蓋自隨而孝祖以敗兵豈有定法哉

閩俗比中州化於善也蔡人過夷貊化於惡也

漢黨錮以節義羣而不黨之君子也唐朋黨以權利比

而不周之小人也漢之君子受黨之名故其俗清唐
之小人行黨之實故其俗弊

姦臣唯恐其君之好學近儒非獨仇士良也吳張布之
排韋昭盛沖李宗閔之排鄭覃殷侑亦士良之術

杜佑理道要訣朱文公謂非古是今之書

魏鄭公曰重君子也敬而遠之輕小人也狎而近之武
帝之於汲黯衛青公孫弘明皇之於姚崇宋璟李林
甫可見矣中庸之尊賢必以修身為本

善言不可離口善藥不可離手孟詵之言也觀物外篇

取之

若璩按孟詵見唐書隱逸列傳

張文潛云節度之強不起於河北之繼襲而起於節度之有功愚考方鎮之強始於僕固懷恩用賊黨田承嗣李懷仙李寶臣分帥河北非有功之將也

司空圖房太尉詩曰物望傾心久匈渠破膽頻注謂祿山初見分鎮詔書拊膺歎曰吾不得天下矣琯建遣諸王為都統節度而賀蘭進明讒於肅宗以司空表

聖之言觀之則瑄建此議可以破逆胡之膽新唐書

采野史稗說而不載此語唯程致道著論

若璩按見程俱房太

尉傳

發揚之

晉以琅邪立江左之業我宋以康

後論

王建中興之基瑄可謂善謀矣

通鑑劉蕡不得仕於朝終於使府御史唐鑑云終於柳

州司戶以新史考之當從唐鑑

宦人深嫉蕡誣以罪貶柳州司戶

顏真卿鄭畋以興復為己任倡義討賊其志壯矣真卿

權移於賀蘭進明畋見襲於李昌言功不克就故才

與誠合斯可以任天下之重

常袞與禮官議禮為君斬袞三年漢文帝權制三十六日我太宗遺詔亦三十六日羣臣不忍既葬而除略盡四月高宗如漢故事玄宗以來始變天子喪為二十七

世多以短喪議漢文帝而不知二十七日之制自玄宗始也

韓偓自書裴君祭文首書甲戌歲銜書前翰林學士承旨銀青光祿大夫行尚書戶部侍郎知制誥昌黎縣開國男食邑三百戶韓某是歲朱氏纂唐已八年為乾化四年猶書唐故官而不用梁年號

慶厯中詔官其四世

孫奕 若據按王氏晚歲自撰誌銘有曰其仕其止如倭如圖聞者咸以謂實錄倭即韓倭圖則卷二十之司空表聖五邇求云 慶厯當作景祐蓋龐籍為漕時奏上倭詩始得官其裔孫也

僕固懷恩叛唐李日月為朱泚將而其母皆知逆順之理良心不可泯也

李光弼與韋陟論戰守曰辨朝廷之禮我不如公若夫軍旅則公不如我陟無以應古者治軍有軍禮焉楚得臣以無禮敗晉文公以有禮勝禮莫大於君臣之分光弼命召不至愧恨以沒蓋以禮與軍旅為二物

也

唐鑑曰人君觀史宰相監修欲其直筆不亦難乎房魏
為相總史事其父彥謙長賢皆得佳傳況不如房魏
者乎

獨孤及福州新學碑銘云閩中無儒家流成公至而俗

易

成公李椅也
在大厯八年

家有洙泗戶有鄒魯

常袞建中初為
閩人設鄉校李

椅

在其前

若璩按唐宗室世系表

蜀王湛五世孫為福建觀察使椅

王福時為博士執許敬宗之謚不改無忝河汾之學矣

許敬宗謚繆而更曰恭陳執中謚榮靈而更曰恭二事相類

武德初以隋張衡死非其罪謚曰忠是獎弑君之賊也

高祖相封德彝宜其以逆為忠也漢大綱正見於戮

丁公唐無三綱見於贈張衡

若璩按贈張衡乃高祖於義寧中事太宗貞觀

二年以裴虔通弑煬帝猶削爵流驩州父子刑賞殆判若天淵矣故曰唐之天下太宗之天下也

朝野雜記曰西漢戶口至盛之時率以十戶為四十八

口有奇東漢戶口率以十戶為五十二口可準周之

下農夫唐人戶口至盛之時率以十戶為五十八口

有奇可準周之中次

其說本程沙隨

歐陽子書唐六臣於唐亡之後貶其惡也朱子書晉處士於晉亡之後表其節也一字之懲勸深矣

五代史周世宗嘗夜讀書見唐元稹均田圖歎曰此致治之本也詔頒其圖法使吏民先習知之期以一歲大均天下之田考之會要世宗見元稹在同州時所上均田表因製素為圖賜諸道崔頌傳云世宗讀唐

元稹均田疏命頌寫為圖賜近臣遣使均諸道租賦

史謂元稹圖誤也稹集有同州奏均田

續通歷云唐同州刺史元

稹奏均租賦帝覽文集而善之寫其辭為圖以賜

歐陽子之論篤矣而不以天叅人之說或議其失司馬公之學粹矣而王霸無異道之說或指其疵信乎立言之難也

歐陽子謂五代禮壞寒食野祭而焚紙錢按紙錢始於開元二十六年王璵為祠祭使祈禱或焚紙錢類巫

覲非自五代始也古不墓祭漢明帝以後有上陵之
禮蔡邕議以為禮有煩而不可省者舊唐書開元二
十年寒食上墓編入五禮永為常式寒食野祭蓋起
於此朱文公謂漢祭河用寓龍寓馬以木為之已是
紙錢之漸唐范傳正謂惟顏魯公張司業家祭不用
紙錢本朝錢鄧州

若據按鄧州
乃錢若水

不燒楮鏹呂南公為

文頌之

兔園冊府三十卷唐蔣王惲令僚佐杜嗣先倣應科目

策自設問對引經史為訓注惲太宗子故用梁王兔園名其書馮道兔園冊謂此也

若璩按宋藝文志亦云杜嗣先晁公武以

為虞世南何也

天子之廢置出於士卒自唐明宗始也明宗以此得之而反爾之報在其後人

後唐天成元年吏部侍郎劉岳奏罷告身綾軸錢本朝復納綾紙錢淳熙元年始免

周顯德六年始去符契專以印章為驗

歐陽子司馬公之貶馮道春秋之法也我朝太宗謂范

質欠世宗一死所以立萬世為臣者之訓

若據按王蠋忠臣不

事二君貞女不更二夫之言直至宋代而明一明於太宗責范質以死一明於程伊川謂餓死事小失節事大而後為人臣為人婦者之防始嚴故宋大有功於綱常余聞諸前輩先生云

唐後主不肯和親而亡石晉父事契丹而興晉之興也
乃其所以亡也桑維翰之興晉即所以亡晉也

朱溫之兄全昱楊涉之子凝式人心之公是非在其家
者如此況天下千萬人之心乎


若據按凝式亦歷事梁唐晉漢周法書中

所稱楊
風子也

梁太祖幸河北至內黃顧李珽曰何謂內黃珽曰河南
有外黃下黃故此名內黃曰外黃下黃何在珽曰秦
有外黃都尉今在雍丘下黃為北齊所廢今在陳畱
五代通錄李珽曰河南有外黃小黃漢地理志陳
畱有外黃小黃縣

五代史記改小黃為
下黃誤也當從通錄

困學紀聞卷十四



總校官庶吉士臣侍朝

校對官檢討臣盧應

膳錄舉人臣韓騰